

# Il martgà da lavur en buna furma

Quota da dischoccupaziun tar 2,6%

DA LUCAS DEPLAZES / ANR

■ **Il Seco ha orientà las medias ier a Berna davart la situaziun sin il martgà da lavur svizzer ed il svilup per ils proxims onns. La quota da dischoccupaziun è sa sbassada l'onn 2018 sin 2,6%. La cassa da l'assicuranza cunter la dischoccupaziun po vegnir sanada l'onn proxim.** Sco quai che ha accentuà *Boris Zürcher*, il directur dal Secretariat da stadi per l'economia (Seco) sa chatta il martgà da lavur svizzer en buna e stabila furma. Quai demussa il svilup da la dischoccupaziun. Quest è sa sbassà l'onn passà sin 2,6% u 0,6% damain che l'onn 2017. Per motivs stagiunals è stada la quota dal mais da december 2018 in zichel pli auta (2,7%). In tras l'auter eran l'onn 2018 var 118 000 persunas senza lavur. En cumparaziun cun l'onn 2017 eran 43 000 persunas pli pauc (17,5%) dischoccupadas. Quella situaziun reflectescha er la buna e stabila situaziun economica da la Svizra. Er per ils proxims onns quintan ils experts cun il svilup positiv, quai vul dir in augment dal product interieur brut dad 1,5% per quest onn e dad 1,7% per l'onn 2020. La quota da dischoccupaziun restia cun 2,4% fin 2,5% sin il nivel actual.

## Obligaziun d'annunziar las plazzas vacantas

Dapi il prim da fanadur 2018 ston 19 secturs economics cun dapli che 8% dischoccupaziun annunziar las plazzas vacantas al center regional per intermediaziun da lavur (CIL). Pertutgads èn



En il Grischun era la quota da dischoccupaziun stada l'onn 2018 tar 1,3% ed en l'entira Svizra è quella stada tar 2,6%.

KEYSTONE

principalmain ils secturs da la hotellaria, da la construcziun e da lavurs auxiliarias. Questa lescha duai promover l'occupaziun da noss agens lavurers, quai vul dir che forzas da lavur indigenas duajan avair la prioritad per l'occupaziun. Durant

tshintg dis restan las plazzas vacantas reservadas ad indigens. Quest sistem po lubar da sminuir in pau l'immigraziun. Sco quei che ha erui Seco èn las annunzias dals posts vacants s'augmentadas da fanadur fin december 2018 – da 3000 l'onn

avant – sin passa 18 000, pia sis giadas dapli annunzias. Bunamain la mesadad ha annunzià il sectur da la hotellaria, suandà da diversas branschas cun 25% e dal sectur da construcziun cun 19%. Seco ha constatà che las interpresas fan stedi

diever dal nov portal digital. Già passan dus terzs da las annunzias via: [www.arbeit.swiss](http://www.arbeit.swiss). Seco vul optimar vinavant il sistem IT cun la finamira da liberar ils collavuradors da lavurs administrativas.

## Augment massiv dals posts da lavur

Actualmain existan en Svizra var tshintg milliuns posts da lavur u passa in milliun dapli che l'onn 1996. Il pli grond augment, numnadamain plus 979 000 plazzas, han ins constatà tar il sectur aut qualificatg (furmaziun academica plus 542 000, sectur tecnic plus 203 000, posiziun da management plus 235 000). Sin il sectur da biro èn las plazzas dentant sa reducidas per 172 000, tar l'artisanadi per 105 000 posts. Il sectur economic svizzer saja fair ed effizient, han ils specialists constatà en cumparaziun cun auters pajas.

## L'assicuranza cunter la dischoccupaziun sanada

L'onn 2010 aveva l'assicuranza cunter la dischoccupaziun in daivet da 7,4 milliardas francs. Per gidar a reducir ils daivets han ins introduci il procent da solidaritad. Grazia a questa mesira ed a la diminuziun dal dumber da las persunas senza lavur è sa reduci il daivet sin 1,1 milliardas francs l'onn 2018, cun contribuziuns da 7,8 milliardas francs ed expensas da 6,7 milliardas francs. L'onn proxim quintan ins che la cassa da l'assicuranza saja sanada. Quella situaziun lubessia al cussegl federal da dismetter il procent da solidaritad ils onns proxims.